

Lettres du Roy

POVR LE PAYEMENT
DES DIXMES DEVES AUX
Beneficiars de son Royaume: Et
aussi pour l'entretènement de ses
Edicts de Pacification, Maiorité,
& autres: & encor de celuy des
Hosteliers.




A PARIS,

Par Robert Estiène Imprimeur du Roy.

M. D. L X V I.

Avec priuilege dudit Seigneur.





De par le Roy.



O S T R E amé &
feal, vous sçauéz
quels sont les E-
dicts & Ordon-
nances que nous
auons tant de fois

faißt reiterer, pour faire iouir les Cu-
rez & autres beneficiers de nostre
Royaume des dixmes qui leur sont
deües: & auós tousiours estimé que
sil sy trouuoit contradiction & em-
peschement, vous feriez si viuemēt
proceder contre les contredisans,
que chascun y prendroit exemple.
Toutesfois tant s'en fault qu'il s'en

soit ensuyui de vostre part aucun
effect & prouision, que lesdicts Cu-
rez & beneficiers y sont plus trou-
blez que au parauant, & y a peu de
personnes auiourd'huy qui veulent
payer lesdictes dixmes: & s'il s'en
paye, la pluspart, tourne au proffict
des Gétilshommes qui s'en saisisét
par force, violans en cela nosdicts
Edicts & ordonnances, & mespri-
sans nos commandemens & aucto-
rité, avec vne asseuree impunité.
En quoy nous voyons telle negli-
gence de vostre part, que nous ne
nous en pouuons aucunement cō-
tenter, & mesmes du peu de deuoir
que vous Baillifs & Seneschaulx fai-
tes de resider en vos Bailliages &
Seneschauſſees, pour y faire obser-
uer nos Edicts de Pacification, Ma-
iorité, & autres, faire cesser les ports
d'armes, harquebuses & pistolets, &

faire faire la punition des cōtrau-
tions, meurtres, volleries, forces &
violences qui se commettent ordi-
nairement. Ce que nous cognoif-
sons biē proceder de ce que vos ab-
sences de vosdicts Bailliages & Se-
neschauffees, & vos negligences &
conniuenes ont esté iusques icy
tolerees, sans que lon ait procedé a-
lencontre de vous par les peines es-
quelles vous estes encourus en ce
faissant: Ce que nous ne sōmes plus
deliberez de tolerer & comporter
en aucune maniere.

ET à ces causes vous mandons,
commandons, & tresexpressément
enioignons, qu'incontinent apres
la reception de ces presentes, vous
Baillifs & Seneschaulx ayez à vous
retirer és principales villes de vos-
dicts Bailliages & Seneschauces, si
ia vous n'y estes, pour de là aller de

ville en ville, & de lieu à autre, ainsi que le bien du pays le requerra, faire obseruer nosdicts Edicts de Pacification & Maiorité, & les declarations & autres ordonances qu'auos fait expedier, tant pour l'establissement & conseruation du repos de nos subiects, punition des crimes & delicts, & cessation des ports d'armes, pistolets & harquebuses, que pour toutes autres choses qui appartiennent à la tranquillité publique & vniuerselle, & au deuoir de vos estats & charges: Pour ueoir à ce qui concerne le payement & perception desdictes dixmes suyuant le contenu de nosdicts Edicts & Ordonances, de façon que lesdicts Curez & autres beneficiers, à qui lesdictes dixmes appartiennent, en iouissent, & les leuent & perçoient sans aucune contradiction ny empesche-

ment, ainsi qu'ils ont fait du passé. Et s'il y en a qui les y empeschent, ou qui s'en saisissent & approprient contre leur volonte, procédez à l'encontre d'eux par saisie de leurs biens, tant meubles qu'immeubles en nostre main, & par establissement de Commissaires, autres q̄ leurs Receueurs & fermiers, & par toutes les autres voyes portees par nosdicts Edicts & ordonnances: d'autant qu'oultre que lesdictes dixmes sōt deues ausdicts Curez & beneficiers de droit diuin, il seroit impossible que sans en estre satisfaiets ils nous peussent continuer le grand & louable secours & subuention qu'ils nous ont faict en nos affaires, & que nous receuons d'eux encores iournellement.

Et d'autant que nous auons faict plusieurs Ordonnances pour donner ordre aux taux excessifs que les

Hosteliers font payer à leurs hostes,
& par lesdictes Ordonnances pres-
cript vn tel ordre, que s'il estoit suy-
ui, les exactions cesseroient, & vi-
ueroit celuy qui voyage & va par
les champs, à pris raisonnable, &
auec hōneste proffit pour l'hoste-
lier : & que de tout cela il s'est aussi
peu faict que du demourant : en
quoy le blasme & desordre ne peult
estre imputé à autres qu'à vous, qui
n'avez iusques icy faict compte d'y
pouruoir : Ne faillez sur tant que
craignez d'estre chastiez par les pei-
nes portees par lesdictes Ordōnan-
ces, de donner tel ordre & reigle-
mēt au faict desdictes hosteleries, &
à la moderation du pris, à ceste heu-
re que Dieu nous donne vne si fer-
tile & abondante annee de tous vi-
ures, tant pour les personnes, que
pour les cheuaux, que nous n'en
ayons

ayōs plus de plainte , & que l'hōme
d'armes entre autres allāt & venant
au lieu de sa garnison , se puisse sau-
uer & entretenir. Et au demeurant
dressez vos procès verbaux, tant de
la résidence de vous Baillifs & Se-
neschaulx , que de l'ordre & proui-
sion que vous aurez donné à l'obser-
uatiō de tous nos deffusdicts Edicts
& Ordōnances , & à la punition des
contrauentions, crimes & malefices
commis au dedans de vosdicts Bail-
liages & Seneschauſſees , leuee &
perceptiō desdictes dixmes, & sem-
blablement au reiglement desdicts
hosteliers & moderation des pris:&
y vſez de telle diligence, que vous
nous enuoyez vosdicts procès ver-
baux à Paris dedans la feste saint
Michel prochain, auquel tēps nous
y ſerons de retour. Et où il y aura
faulte de vostre part, asſeurez vous

que nous ferons proceder alencontre des deffaillans par priuation de leurs estats & offices, & autres peines portees par nosdicts Edicts & ordonnances, sans aucune esperance de moderatiõ: d'autant qu'apres tant de reiterez commandemens, nous voyons biẽ qu'il est requis que nous en vsions de ceste sorte, si nous voulons estre obeis pour l'aduenir.

Donné à Villiers-coste-Retz le huiẽtieme iour d'Aoust, mil cinq cens soixante six. Et de nostre regne le sixieme.

Signé, CHARLES.
Et au deffous,

DE L'AVBESPINE.

DE PAR LE PREVOST
de Paris.

Il est ordonné & enjoinct à toutes personnes qui voudront faire plainctes des contrauentions aux Ordonnances declarees en ce present Edict & ordonnance du Roy, de faire donner assignatiō sommaire aux contreuenants à icelles par deuant nous en la Chambre ciuile du Chastelet de Paris, pour estre faict droict aux parties ainsi qu'il appartiendra par raison. Faict le Mercredi xiiii iour d'Aoust, l'an mil cinq cens soixante six.

Signé . BARBEDOR.

Et sur la superscription est escript
*A nostre amé & seul le Preuost de
Paris, ou son Lieutenant.*

B.ii.

LEVES & publiees à son de trompe & cry public par les carrefours de ceste ville de Paris, lieux & places accoustumez à faire cris & proclamations, par moy Pasquier Rossignol Sergent, Crieur iuré pour le Roy en la ville, Preuosté & Viconté de Paris, accompagné de Michel Noiret commis par le Roy pour trompette esdicts lieux, le Mercredi quatorsieme iour d'Aoust, mil cinq cens soixante six.

Signé

ROSSIGNOL.

EXTRACT DV

Privilege.

PAR lettres patentes du Roy, donnees à Paris le xvii iour de Ianuier, mil cinq cens soixante trois, signees Par le Roy en son Conseil, BOVRDIN, & scelees du grand seal dudiect Seigneur en cire iaulne sur simple queue: Confirmatiues d'autres lettres patentes donnees à saint Germain en Laye le viii Octobre, M. D. LXI, signees Par le Roy, Vous Monsieur le Chancelier present, DE L'AVBESPINE, & scelees comme dessus: Verifiees en la Cour de Parlement à Paris le xviii iour de Feburier audiect an: Il est permis à Robert Estienne son Imprimeur ordinaire, d'imprimer ou faire imprimer, vendre & debiter tous Edicts, Ordonnances, Mandemens & Lettres patentes: sans qu'autres Libraires & Imprimeurs les puissent imprimer, ne faire imprimer durant le temps & terme contenu esdictes Lettres patentes, si ce n'est du vouloir & consentement dudiect Estienne. Sur peine de confiscation desdicts liures, & d'amende arbitraire, & autres amendes, despens, dommages & interests dudiect Estienne.





